

Constelacion number 12 di Parlamento di Aruba a huramenta



Ayera mainta, Constelacion 12 di Parlamento di Aruba a huramenta. Den presencia di Gobernador di Aruba Su Excelencia Alfonso Boekhoudt, y dilanti famia y publico presente, 21 parlamentario a huramenta pa forma parti di e Parlamento nobo di Aruba.

Parlamentario di fraccion MEP, Shailiny Tromp-Lee, ken tabata vice presidente di constelacion number 11 di parlamento y a keda eligi pa forma parti di e constelacion nobo, a presidi e ceremonia di huramentacion enfatisando e importancia di e esaki pa sistema democratico. “Awe ta e dia cu representantenan di e organo mas halto di

e pais Aruba ta huramenta y trabou di parlamento number 12 ta inicia,” el a indica.

Griffier di Parlamento, Sr. Herman Hek, a lesa e texto di huramentacion y despues, a base di orden alfabetico, a yama cada persona pa dilanti pa huramenta conforme ley den idioma Hulandes dilanti di Su Excelencia Gobernador di Aruba.

E ceremonia di huramentacion tabata parti den dos parti. E prome parti tabata consisti di parlamentarionan cu a huramenta dilanti Gobernador di Aruba. Esakinan tabata Jennifer Arends-Reyes (AVP), Wendrick Cicilia (AVP),

Endy Croes (MEP), Gerlien Croes (Futuro), Mike de Meza (AVP), Arthur Dowers (AVP), Mike Eman (AVP), Sonaly Fernandez-Acosta (AVP), Clifford Heyliger (AVP), Xiomara Maduro (MEP), Otmar Oduber (PPA), Stephany Sevinger (AVP), Hendrick Tevreden (MEP), Rocco Tjon (MEP), Shailiny Tromp-Lee (MEP), Edgard Vrolijk (MEP), y Evelyn Wever-Croes (MEP).

E di dos parti di e ceremonia a consisti di parlamentarionan cu a haci promesa dilanti Gobernador di Aruba. Esakinan tabata Gino Goeloe (Futuro), Dangui Oduber (MEP), Geofrey Wever (Futuro) y Mervin Wyatt-Ras (AVP).



Rocco Tjon (MEP)



Shailiny Tromp-Lee (MEP)



Evelyn Wever-Croes (MEP)



Gino Goeloe (Futuro)



Dangui Oduber (MEP)



Geoffrey Wever (Futuro)



Wendrick Cicilia (AVP)



Sonaly Fernandez-Acosta (AVP)



Otmar Oduber (PPA)



Gerlien Croes di partido Futuro scogi como presidente di Parlamento

Ayera tardi despues di ceremonia di huramentacion di e 12 constelacion di Parlamento di Aruba, a tuma luga e di siete reunion publico y prome pa e constelacion 12 di parlamento, durante cual a tuma luga e votamento pa presidente y vice presidente di parlamento.

Parlamentario di fraccion MEP, Shailiny Tromp-Lee, ken den e constelacion anterior tabata fungi como vice presidente di parlamento a presidi e reunion como presidente di parlamento. Esaki pa motibo cu Tromp-Lee si a logra drenta parlamento despues di eleccion di dia 6 di december y e anterior presidente di parlamento, Raymond Kamperven, no.

Primeramente Tromp-Lee a

duna un splicacion amplio di con e proceso di votamento ta tuma luga. Esaki specialmente pa parlamentarionan nobo cu pa prome biaha ta drenta parlamento ta na altura di e proceso y reglanan importante cu mester tene cuenta cune.

Tromp-Lee a anuncia e comision di tres parlamentario cu tabata encarga cu conteo di votonan. E comision aki tabata consisti di Rocco Tjon (MEP), Mike de Meza (AVP) y Gerlien Croes (Futuro).

E proceso di votamento tabata consisti di cuater tanda. Durante e prome tanda e parlamentarionan a vota pa e prome nomber pa candidato pa presidente di parlamento, durante e di dos tanda a vota pa e segundo nomber



Gerlien Croes (Futuro)

pa candidato pa presidente di parlamento. Durante e di tres tanda a vota pa e prome nomber pa candidato pa vice presidente di parlamento y durante e ultimo tanda a vota pa e di dos nomber pa

candidato pa vice presidente di parlamento.

Ta vota pa un di dos nomber den caso cu su Excelencia Gobernador di Aruba Alfonso Boekhoudt ta mira

algun obstaculo pa confirma e prome nombernan pa presidente y vice presidente, tin un segundo opcion pa recurri na dje. Pero esaki ta algo cu usualmente no ta pasa.

Resultado di votamento pa presidente di Parlamento di Aruba a keda como lo siguiente: parlamentario Gerlien Croes di partido Futuro a keda eligi como presidente di parlamento cu 20 voto na fabor y cu un voto nulo.

Pa lora ta vice presidente di parlamento e resultado a keda como lo siguiente: parlamentario Mervin Wyatt Ras di partido AVP a keda eligi como vice-presidente di parlamento cu 12 voto na fabor y 9 voto a bay pa parlamentario Shailiny Tromp-Lee di partido MEP.